

弘

簡

錄

弘簡錄卷一百之二

明刑部員外郎仁和弘齋邵經邦學

皇清翰林院侍講學士四世孫遠平校閱

字輔 宋二之四

王曾

字晦

張知白

張士遜

字友直等

呂夷簡

字公弼公綽

王隨

陳堯佐

章得象

祖頴從子案望之孫粹綽等

晏殊

杜衍

賈昌朝

伯祖瑛弟昌衡從子矣

王曾字孝先青州益都人少孤仲父宗元鞠之學於里人張震

文辭優贍占中三元除將作監丞通判濟州代還特試政事堂

寇準奇之授著作郎直史館爲三司戶部判官使契丹致書稱

爲北朝曾曰從其國號足矣何用對稱兩朝上是之然弗果易

僅隨事損益豐約中度後來使者悉循其制時稱得體遷右正

言知制誥兼翰林學士入對言天瑞荐至以誇示中外此誠盛德所致然願推而弗居異日或有災沴可免輿議及建玉清胎應宮復陳五害以諫帝重大理刑獄舊制郎中判之特以命曾因請自辟僚屬著爲令帝嘗晚坐承明殿召對不及朝服退使內侍諭意向思卿甚勿以爲慢其見尊禮如此移知審刑院舊例違制無故失率坐徒二年曾請須親被旨乃坐遷主客郎中知審官院歷通進銀臺司勾當三班院以右諫議大夫參知政事時宮觀皆輔臣領使曾當使會靈以推欽若帝不悅曰大臣宜傳會國事豈容自異曾頓首曰君從諫謂明臣盡忠謂義臣知義而已不知異也欽若方排異已乃發曾市賀后家第宅小事罷爲禮部侍郎判都省俄山知應天京師以南訛言有妖若飛帽夜搏人曾令夜聞里門敢倡言者坐之卒以無妖徙天雄

軍復參知政事遷吏部侍郎兼太子賓客真宗不豫命太子監
事資善堂后實居中預政事皆專決中外方憂之曾密語后戚
錢惟演曰太子幼非中官不能立中官非倚太子不能安願加
恩太子太子安則劉氏亦安惟演以爲然因入白后深見聽納
遣詔立仁宗皇太后權聽斷軍國大事丁謂欲去權字曾謂皇
帝冲年太后臨朝斯國家否遷稱權猶足以示後且增減制書
法令有在表則之地何可亂乎遂不敢去遷禮部尙書時議臨
朝儀曾與羣臣請如東漢故事太后坐帝右垂簾奏事謂獨請
帝朔望見羣臣有大事則太后召對輔臣決之非大事令入內
押班雷允恭傳奏禁中畫可以下言兩宮異處而柄歸宦官
禍端兆矣既而果得罪自是兩宮垂簾輔臣奏事咸如初議時
帝始崩內外洶洶曾正色獨立朝廷倚以爲重拜中書侍郎同

平章事集賢殿大學士天聖三年以戶部尚書兼門下侍郎昭
文館大學士監修國史奏帝德方昇宜近師儒命孫奭馮元勸
講崇政殿四年夏大雨喧傳汴口決水大至都人皆恐咸欲東
奔帝以問曾謂訛言不足爲果亦無害陝西轉運置醋務權以
取利請推其法於天下力言罷之爲政方嚴持重每進見言利
害事審而中理尤好拔材專惡僥倖嘗因帝問比來臣僚多請
對求進曾言願陛下排斥競崇恬靜庶幾有難進易退之風曹
利用惡班已上快快不悅及坐事太后大怒輒爲之解后曰卿
向言其橫今何解也曾曰利用素恃恩臣故嘗折以理今加大
惡則非所知后意少釋始後輕比先議太后受冊將御大安殿
曾執爲不可及長寧節上壽止令供張便殿又稍通左右姻家
請謁多裁抑之后滋不悅會玉清宮災罷知兗州復以彰信節

度使知天雄軍契丹使往還斂車徒而過無敢譁者人樂其政
爲畫像生祠之收天平軍判河南景祐元年遷樞密使明年拜
右僕射同平章事學士如故加封沂國公進退士人不肯沽恩
故人莫有知者范仲淹嘗問明揚士類宰相責也公之盛德似
少此耳曾曰執政者恩欲歸已怨使誰歸仲淹服其言夷簡初
參政事事曾甚謹曾力薦爲相及後位曾上又任事久多所事
次漸不能堪論議間有異同帝疑以問曰卿亦有所不足耶時
風聞知州王繼明納賂事曾以詆夷簡其言未免有過遂俱罷
以左僕射資政殿大學士判鄆州寶元元年十月有大星晨墜
其寢左右驚告語以後一月當知如期而薨年六十一贈侍中
諡文正爲人丰姿端厚矜目如畫在朝出入進止皆有常處視
者不失尺寸性復周密沉静在上前開陳辨博有餘平居寡言

笑未嘗及省中語。當國七年，莫敢干以私人。謂務大體，若丙吉清淨如曹參。領衆職如魏相。進賢不植私愛，不立黨援。退不肯不奸怨親族，可任言之上。不可任厚分之財。時被其化，察察者敦沾沾者愧焉。皇祐中，仁宗篆神道曰旌賢之碑，改鄉曰旌賢鄉。大臣賜碑篆如此。仁宗祔廟配享第一。無子，以從子繹爲後。繹官至兵部郎中，秘閣校理。本生父名岬，字子融。後以字行。復字熙仲。及第，遷太常丞，同知禮院。嘗論：「次國朝以來典禮因革爲禮閣新編。」又集五代事爲唐餘錄，以獻。進直龍圖閣，累遷太常少卿，判大理寺，仍取獄輕重可爲準者類次以爲斷例。拜天章閣待制、吏部郎中，知荆南，遷右諫議大夫，給事中，進刑部侍郎，致仕卒。

朋曰：君臣同德，亦同其命。社稷之臣，卓哉文正。胡獨嗣堅。

休戚相並文節偶同難云天定

張知白字用晦滄州清池人方九歲父喪邢州殯於佛寺既長
篤學聰悟嘗與孫何讀道旁古碑凡數千言還誦畧無所遺及
登第徒步往求父喪時契丹寇河北寺宇已廢尋至殿基恍然
識其處發之衣衾皆可驗衆歎其誠孝累遷河陽節度判官疏
當今要務真宗異之名試合人院權右正言獻鳳晨箴出知劔
州逾年召試中書改直史館面賜五品服判三司開拆司江南
早與李昉分路安撫及還權管勾京東轉運事司天言周伯星
見宜賀知白以爲人君當修德應天星之見伏無所關繫因陳
治道之要帝詰宰臣曰可謂乃心朝廷矣東封進右司諫請以
泰山諸瑞圖寘昭應宮藏其副秘閣以後無俾誕漫命出按陝
西饑尋知鄧州會關右流徙至境發倉廩募民粟以濟之擢龍

圖閣待制知審官院再遷工部郎中使契丹還以時方重內輕外獨引唐李嶠議遷臺閣典藩郡故事固請補外擢知青州代還求領國子監帝疑倦於處劇宰臣言其更踐中外未嘗爲身謀乃遷右諫議大夫權御史中丞兼給事中俄拜參知政事郊恩進工部侍郎班在王曾下心不能平累表辭職詔加金紫光祿大夫判禮儀院與欽若論議多相失稱疾辭位罷爲刑部侍郎侍讀學士知大名府轉南京留守丁謂惡欽若罷爲分司意其報怨既至待之加厚謂怒復徙亳州遷兵部侍郎仁宗卽位入爲尙書右丞樞密副使天聖初契丹大閱聲言獵幽州朝廷患之以問二府皆請練師積粟以備不虞知白獨言修好未遠正以上初政試觀舉措何如耶豈可輒自生彘耶若終以爲疑莫如因河決發兵以防護爲名彼且不虞果如其言而罷三年

拜工部尚書集賢殿大學士同中書門下平章事領合蓋觀使時進士唱第賜中庸篇上命知白進讀至修身爲政之要必反復陳之在相位慎重名器無毫髮私屢以盛滿爲戒雖經顯貴清約一如寒士體素羸弱憂畏日侵六年春二月忽感風眩帝臨問已不能語薨爲罷上已宴贈太傅中書令諡文節無子以姪子思爲後仕至工部侍郎致仕

張士遜字順之祖裕主陰城鹽院因家焉初生喪母父姑鞠之登進士調鄖鄉簿遷射洪令檄移治鄰縣民遮馬首不得去聽選知州張雍薦爲第一改襄陽令遷著作佐郎知邵武縣以寬厚得民前後禱雨輒應改秘書丞監折中倉歷御史臺推直官楊億薦爲監察御史當巡糾貢舉初用糊名法以親嫌避去著爲令遷侍御史歷江西廣東河北轉運使河侵棣州詔移治陽

信議者患糧多難徙士遜爲視瀕河艱食州縣權貸之期來歲輸陽信公私便利仁宗出閣帝特選士遜以戶部郎中直昭文館爲壽春郡王友令王各拜禮異府僚封昇王又爲諮議參軍建儲歷左右庶子詣資善堂升階列拜太子詹事受請詔坐受帝不許自今凡遇太子侍駕出入許陪從連任太子賓客詹事改樞密直學士判集賢院仁宗卽位擢樞密副使遷給事中尙書左丞天聖三年拜禮部尙書同中書門下平章事集賢殿大學士曹訥獄起官者羅崇勳江德明方用事因譖利用帝疑以問執政咸願望未敢對士遜徐曰此獨不肖子爲之利用大臣宜不知狀太后怒將罷之帝以東宮舊臣改刑部尙書知江寧解通犀帶賜之後領定國軍節度使知許州明道初召復中書侍郎兼兵部尙書太后別進門下侍郎昭文館大學士監修國

史是歲旱蝗不能有所建明及帝自損尊號請降官一等以答
天變不許會上莊懿太后諡士邇邇楊崇勳飲不至爲中丞
范諷所劾罷爲左僕射判河南入謝改節山南東道同平章事
判許州寶元初復召封郢國公入對帝從容言朕昨放官人不
獨憫幽閉亦省浮費近復有獻女者朕卻而弗受士邇曰此盛
德事也帝又曰近言官有毀大臣揭君過者對曰陛下但察其
邪正則險訐之人宜自戒矣會有挾怨告陳堯佐謀反誣諫官
陰附宗室者士邇謂此皆儉人構陷善良以搖朝廷恐姦僞一
開禍無所紀帝悟而止馮士元獄具帝復以問對曰臺獄阿徇
非出宸斷何以愜中外之論帝曰君子小人有黨乎曰有之第
公私不同誠使法令必行邪正有別則朝綱舉矣康定初言禁
兵久戍其家有不能自存者帝命條指揮使以下爲差等出內

藏錙十萬賜之又請遣使安撫陝西以命韓琦詔密院自今邊
事並與士通等參議值棟輦官千餘人爲禁軍遮兩府喧訴士
遜方朝馬驚墮地上章請老拜太傅封鄧國公致仕宰相得謝
自此始也御酒飛白千歲二字賜之因建千歲堂就第凡十年
薨年八十六上臨奠贈太師中書令謚文懿御篆神道曰舊德
之碑生平事所鞠姑盡孝亡爲行服徒跣以葬追封南陽縣大
君其在政府日人見其無所可否以和藹目之爲御史楊偕所
劾謂納女口官中亦未之明也子友直字益之初補將作監
簿遷丞父爲請館閣校勘仁宗不可言館閣所以侍英俊自今
毋得增員但令館閣讀書後編書籍成始遷秘閣校理同知禮
院復登進士除集賢殿修撰天章閣待制累遷工部郎中知襄
陝越三州父嘗記東宮舊事史官未之見者友直纂爲資善錄

上之友正字義祖杜門不治家事居小閣學書積三十年不輟
遂以書名神宗評其草書爲本朝第一

冊曰勢位靡常人苦莫知千歲名堂今古所稀吁嗟若人
可以語幾

呂夷簡字坦夫祖龜祥爲殿中丞知壽州遂爲州人父蒙亨進
士高等以蒙正柄國寄理報罷後歷下蔡武平二簿至道初引
對文學政事俱優歷光祿大理二寺丞咸平三年夷簡登第補
絳州軍事推官改潁州遷大理丞太常博士祥符中按河北水
災遷知濱州還奏農器有筭非所以勸力本也詔除之擢提點
兩浙刑獄名爲祠部員外郎時大營官觀掄材南方期會工徒
至有死者請緩其役又言盛冬挽運艱苦亦須河流漸通漕卒
番送真宗曰覽卿奏可謂有爲國愛民之心矣改刑部兼侍御

史知雜事蜀寇李順俘送闕左右稱賀旣而按之非是賀者趣具順獄夷簡不肯卒以實奏永興卒上寇準變事夷簡曰是欲中傷準爾宜勿問值歲蝗請上責躬修政嚴飭輔相以共順天意又奏彈李溥專利罔上不法狀咸詔從之俄避中丞趙安仁親嫌改起居舍人兼通進銀臺封駁司使契丹還還知制誥兩川僞爲安撫使進龍圖直學士刑部郎中權知開封治嚴辦有聲上識姓名御屏將大用之仁宗立進右諫議大夫給事中參知政事與魯宗道驗治山陵地請納天書方中因言太后欲因祈廟具平生服玩器具及以銀耳覆神主此皆未足爲報惟有遠茲邪獎忠直輔成聖德斯所以報先帝也郊恩以故事豫辭遷官久之除禮部侍郎天聖七年進拜戶部侍郎同中書門下平章事集賢殿大學士充景靈宮使昭應宮災太后意將復營

因推洪範災異以諫。后爲之然。然復奏罷兼官觀進吏部侍郎。昭文館大學士監修國史。天聖末。加中書侍郎。順容李氏薨。司天希旨言歲月葬未利。夷簡奏順容誕育聖躬。倘喪不成。禮異日必有受其罪者。請發哀成服備儀。伏葬之詔。又欲鑿宮垣以出。因復求對。太后揣知其意。遣羅崇勳問何事。夷簡言。鑿垣非禮。宜自西華門出。崇勳馳白太后。許之。大內火。帝御拱辰門。百官拜樓下。夷簡獨不拜。曰。宮庭有變。願一望清光。帝舉簾見之。乃拜。督修大內。成進尚書右僕射。兼門下侍郎。荆王子長育禁中。太后欲留從帝。誦讀讎曰。上富於春秋。所親非儒學之臣。恐無益聖德。卽命還邸。帝親政。首陳八事。正朝緝。塞邪徑。禁貨賂。辨佞士。絕女謁。踈近習。罷力役。節冗費。語甚切至。帝始與夷簡謀將罷太后所任張耒等。退而語郭皇后曰。夷簡獨不附太后。

耶但多機巧善應變耳明日亦罷爲武勝軍節度使檢校太傅同平章事判陳州歲中復相適郭后因批尙美人頗誤傷帝頸以爪痕示之夷簡曰光武漢之明主止以怨懟廢郭后况傷陛下頸乎議遂決又以宗室子衆議建睦親宅增教授員置大宗正以糾率之景祐二年加右僕射封申國公坐與王曾爭論帝前同罷以鎮安軍節度使同平章事判許州康定元年復召慶曆元年進封許國公命總判樞密院事諫官田況言總判名太重改兼樞密使契丹聚兵幽薊聲言將入寇議者請從范仲淹初議城洛陽以備急難夷簡奏契丹畏壯侮怯邈城洛陽亡以示威若使得渡河雖高城深池何可恃耶且景德之役非乘輿渡河亦未易服宜卽眞宗駐蹕之所建都示將親征以伐其謀上從之乃建北京二年病上憂之剪髭以療加特進司空平章

軍國重事。五日至中書。三年罷爲司徒監修國史。預議軍國大事。名見延和殿。命內侍與以前問誰可代。因薦富弼。遂以太尉致仕。薨年六十六。帝泣對羣臣。安得憂國忘身如若人者乎。贈太師。中書令。諡文靖。始仁宗幼冲。太后臨朝。十餘年。天下晏然。其力居多。後西夏用師。契丹求地。復賴計畫。選將命使二邊。以寧。然建募萬勝軍。雜市井小人。浮脆不任戰鬪。用宗室補環衛官。驟增奉賜。加契丹金緡歲二十萬。當時不浚計之。其後費大而不可止。又成郭后之戮。逐孔道輔。范仲淹於外。時論以此少之。遇天下事。屈伸舒卷。動有操術。故柄國最久。嘗令宋綬編中書總例。語人曰。自吾有此例。雖庸夫執此。可任宰相矣。後言官雖數詆。脊倚不衰。然所斥士旋復收用。亦不終棄。帝又欲立陳氏女。力請止之。始王旦語王曾言其器識遠大。君宜善交之。

卒與曾同相後同配食仁宗廟庭稱名宰相曾家請御篆墓碑
帝亦慘然思之因書懷忠之碑以賜有集二十卷四子公著宰
相公弼字寶臣登進士遷直史館河北轉運自寶元慶曆以
來宿師備邊雖撤警屯戍如故民疲餽餉公弼始通御河漕粟
塞下權冶鐵以助經費仁宗嘉其材識名殿柱擢爲都轉運加
龍圖閣直學士知瀛州入權開封管奏事退帝以爲甚似其父
日送之改同羣牧使時英宗居藩得賜馬頗劣欲易不可尋以
樞密直學士知渭與延州徙成都其治尙寬人疑少威有管卒
犯法當杖扞不受曰寧以劒死公弼曰杖者國法劒汝自請杖
而後斬之軍中肅然英宗嗣位爲三司使繼蔡襄後時多留事
帝問何以處之頓首謝曰襄勤於事未嘗有曠失恐言者過耳
人稱其長者拜樞密副使言諫官耳目執政股肱二者必相爲

用然後身安而元首尊宜考言觀事視其所以而進退之勿數
因爭事罷去。薺出營室上言薺非小變請皇上飭身修德以應
天戒神宗立轉刑部侍郎司馬光劾內臣高居簡公弼言二臣
勢不兩立居簡內臣耳而光中執法願陛下擇其重者問當奈
何對曰遷居簡一官而解其近職光當無爭從之俄進樞密使
時欲併環慶鄜延爲一路駁以自白草西抵定遠中間相去千
里猝有緩急將何以應乃止陳升之譏衛兵年四十以上稍不
中程者減其廩徙之淮南疏以非人情儻有反側爲之奈何帝
曰是當退爲利員者今故爲優假何害對言臣不敢生事邀名
正恐誤國耳。韓絳議復肉刑又力陳不可帝皆爲之止公弼素
不附安石將草疏論新法從孫嘉問竊取以示安石先入白之
遂罷爲觀文殿學士知太原府時韓絳將城囉兀令發兵二萬

趣神堂新路公弼度敵必設伏待我改由永和關旣而新路援
兵果遇伏詔褒之麟州無井泉由外汲欲築城包之而土善陷
每敵圍城人憂渴死公弼用僚屬鄧子喬計去其沙實以末炭
墮土於其上版築立就自是得堅其守王韶取熙河謀置帥帝
謂其有緩御之能拜宣徽西院使判秦州却羌酋董毡貽書稱
故後懼不敢纔旬月以疾爲西太一官使卒年六十七贈太尉
諡惠穆公綽字仲佑蔭補將作監丞知陳留爲館閣校理歷
太子中允工部員外郎史館修撰判太常寺時郊廟祭器未完
制度多違禮請悉更造故事議定薦新諸物或過時陳敗因採
月令諸書四時新物所當薦者配合爲圖以獻諸后皆繫祖宗
諡獨真宗五后尙諡莊請更爲章悉行其言後爲龍圖閣學士
知開封終右司郎中爲人通敏有才然多徇人干請洩漏市恩

故人以比竇申 公孺字稚卿蔭爲奉禮郎登第判吏部南曹
仁宗喜其占對詳敏歷知澤潁廬常四州判都水監改陝西運
使元豐初命知永興軍徙河陽元祐中加龍圖直學士遷刑部
侍郎知開封爲政明恕終戶部尚書生平廉儉與人寡合嘗護
曹伯喪辭厚餉不受世清其節

冊曰盛德無涯權術有殊帝母則得帝后何辜終帝之世
白璧有疵所以修齊而後國治

王隨字子正河南人登甲科爲將作監丞通判同州遷著作郎
直史館判三司磨勘轉京西運副陞辭官得侍殿慈藥膳聖主
之澤真宗賜詩寵行以牟酒束帛過家爲壽遷淮南運使父憂
起復值歲饑敕屬部出庫錢貸民市種根歲中約轉絹以償流
移復業徙河東三遷刑部員外郎兼侍御史知雜事擢知制誥

出知應天改揚州尋加右諫議大夫權開封命兼太子右庶子
仍領府事俄遷給事中周懷政誅自陳出知杭州乾興初復降
秘書少監徙通州忠學者少大修孔廟興起學校州人喜悉遣
子弟就學母喪起復光祿卿知潤州徙江寧歲大饑大出官粟
平價糶之復給事中以龍圖閣直學士知秦州故時軍卒犯罪
逃入蕃部者多奴畜之小不如意復執出求貲隨下教能自歸
者免罪復隸軍籍由是多來歸者又請增蕃落卒給廢閑馬地
募民耕種徙河南復入爲御史中丞同知貢舉遷禮部侍郎翰
林侍讀二學士明道二年安撫江淮還轉戶部侍郎拜參知政
事改吏部侍郎知樞密院事監護莊惠太后園陵景祐四年拜
門下侍郎同中書門下平章事昭文館大學士監修國史故事
初入相無越遷門下者蓋學士丁度之失也頃以疾告詔五日

一朝入中書視事爲相一年無所建明與陳堯佐韓億石中立
數爭事會忤代地震諫官韓琦言四臣皆非韓佐亦同俱罷
以彰信軍節度使同平章事判河陽堯贈中書令益章惠後改
文惠爲人外若方嚴內失於寬臨事多汗漫不能彈壓晚更下
急輒慢罵人性喜佛慕裴休然風跡弗逮

陳堯佐字希元少聰悟好學肄業錦屏山登第歷魏縣中牟二
尉爲海喻一篇人奇其志授秘書郎知朝邑縣以兄堯叟使陝
西發中人方保吉罪中人怨之誣以事降本縣簿徙下邳復知
真源縣轉開封司錄叅軍遷推官坐言事忤旨降潮州通判修
孔子廟作韓吏部祠有張氏子爲鰥魚所食遣吏往捕果得人
驚異之名還直史館知壽州歲饑捐俸廩爲糜聞者競勸出粟
益多賑活數萬人徙廬州父疾告歸侍俄爲兩浙運副初構石

爲錢塘江隄不久輒壞堯佐請下薪實土築之丁謂初不謂然後卒如其議徙京西河東地儉民仰石炭爲生奏蠲其稅又減澤州大廣冶鐵課數十萬徙河北毋老祈歸就養起糾察在京刑獄爲御試編排官坐置等誤降監鄂州茶場天禧中復知滑州河決造木龍以殺水怒徐築長堤人呼爲陳公堤復徙京西運使入爲三司戶部副使徙度支同修眞宗實錄擢知制誥兼史館修撰知通進銀臺司進樞密直學士知河南徙并州每汾水暴漲民輒驚擾爲築堤植柳數萬本作柳溪民賴其利召同修三朝史代弟堯咨同知開封府累遷右諫議大夫翰林學士拜樞密副使知祥符陳詒治吏嚴急空縣逃去太后怒命加詰罪時夷簡姻聯不決堯佐獨曰罪詒則姦吏得詐後誰敢復繩者由是得免天聖七年除給事中叅知政事太后崩例罷以戶

部侍郎知永興軍過鄭爲郡人王文吉所告下中丞范諷劾治
改知廬與同州復知永興奏言唐賢墓石碑礮悉因宦官起浮
圖充磚甃前守姜遵毀及十七八矣其未毀者願敕州縣完
護之徙知鄭州景祐四年加同中書門下平章事集賢殿大學
士以唐劉蕡策進對言蕡之言皆當今之病天下治亂自朝廷
始此臣之所欲言陛下之所宜行上嘉納之寶元元年災異數
見援漢故事自責求去罷爲淮康軍節度使復判鄭州尋加太
子太師致仕薨年八十二贈司空兼侍中諡文惠自登顯位讀
書不輟善隸古并八分書爲方丈大字筆力端勁老而不衰尤
工詩性儉約見動物必戒勿殺器服壞輒補之無使不完見棄
晚號知餘子有文集三十卷又有潮陽編野廬編愚丘集遺興
集

章得象字希言高祖仔鈞事闔爲建州刺史始家浦城後徙泉州祖頻字簡之與弟頤俱擢第歷校書郎大理殿中二丞知南昌九隴長洲三縣降監慶州酒天禧初擢監察御史安撫京西還爲三司度支判官屢按青州麻士瑤鞠邛州牙校訟鹽井事復忤旨捕繫后族劉美出知宣州還遷侍御史坐丁謂左遷比部員外郎監饒州酒起知信州改刑郎知福州不肯鬻王氏時賦民官田徙知潭州改廣西轉運撫宜州守貪暴不法反爲所訟謫知饒州入爲度支判官至刑部郎中使契丹卒父英妻方娠夢遇神人授以玉像及生復夢積笏充廷長而好學美儀表莊重不浮及第爲大理評事知玉山縣遷大府殿中二丞東封簽判兗州改知台州歷南雄洪州楊億表薦得象有公輔器謂閭士率多輕狹獨得象深厚有容度量宏廓此其所以異也未

幾召試爲直史館安撫京東權判三司度支選刑部郎中使契丹改兵郎知制誥踰年爲翰林學士遷右諫議大夫至給事中復爲羣牧使太后臨朝遷禮部侍郎兼龍圖閣學士進承旨兼侍講仁宗親政以其無所附麗擢同知樞密院事寶元初特轉戶部侍郎同中書門下平章事集賢殿學士而諭登用之由謂卿清忠且乏干請故耳陝西用兵爲中書侍郎加工部尙書兼樞密使明年除昭文館大學士慶曆五年上章請罷拜鎮安軍節度使同平章事封郇國公判河南尋守司空致仕薨故事乘輿不臨奠帝特往焉贈太尉兼侍中諡文憲皇祐中改諡文簡爲人性淡薄恬然自得居翰林十二年宦官方倚后勢每遣至必正色待之不交一言在中書八年宗黨親戚一切抑遠然於當世急務模稜無所建明爲御史孫抗所論初闔諺南臺江合

出擊至是沙湧可涉人以爲驗無子從子案與望之同蔭
案字質夫父訪由校書郎遷三班奉職案由孟州司戶叅軍試
禮部第一擢知陳留歷提舉陝西常平京東運判提點湖北刑
獄成都路轉運使入爲考功員外郎元祐中以直龍圖閣知慶
州與章惇同宗性好興事時朝廷一意戢兵捐葭蘆等四砦夏
得之益驕案言夏人嗜利畏威不有懲艾不得休息宜稍削其
地以固邊圉擇據要害乘便出討以致其師夏果圍環州案遣
折可適伏兵洪德城與之遇斬獲甚衆又預毒於牛圈潛敵人
馬飲者多死召權戶部侍郎改知同州紹聖初除集賢殿修撰
知應天與廣州徙江淮發運使哲宗訪邊事合旨移知渭州奏
築胡蘆河川二城據形勝以備夏陰備板築守戰陽示以怯率
熙河秦鳳環慶四路之師出於石門峽江口好水河之陽二旬

有奇成之賜名平夏城方興靈平砦役夏衆來爭迎擊敗之既而環慶鄜延河東熙河皆相繼築城夏人貽聘因奉其母合兵數十萬圍平夏城建高車填塹不能克遁去其統軍鬼名阿埋西壽監軍妹勤都通皆勇悍善戰案謀其弛備遺折可適郭成輕騎夜襲直入其帳執之盡俘其家禽馘三千餘牛半十萬以後不復能軍屢乞通和哲宗御紫宸殿受賀始令罷兵擢案樞密直學士屢遷龍圖閣端明殿學士進階大中大夫在涇原四年凡剗州一城砦九薦拔偏裨無間廝役可適本降人與李忠傑朱智用咸受控馭推所立功爲西方最徵案徙知河南入見拜樞密同知請老終資政殿學士中太一官使贈右銀青光祿大夫諡莊簡七子 繹由開封推官侍父養遷戶部員外提點淮東刑獄權知揚州兼提舉香鹽以時鑄崇寧大錢市區畫閉

持錢買物至日盱無肯售幾至大亂見而哀之爲飭市易務以
百貨易小錢撤倉吏糴米麥予以大錢盡十日止民心始安又
言鈔法誤民新鈔既行舊鈔盡廢一時商賈無指自盡屬蔡京
怒奪其官綜第進士歷陝西運判入爲戶部員外贊妹婿劉建
漸復元祐之政亦爲京所惡出知朔州主管西京崇福宮綜歷
通判常州綰知丹徒縣鈇簽判西京續簽判蘇州孫茂承奉耶
蓋監蘇州稅俱列顯仕遇京復相思傾章氏與居蘇州得私鑄
錢數璫諷言者誣與州人郁寶所鑄遣李孝壽張茂直沈疇蕭
服更往訊無驗別遣孫傑鞠之傳致如法刺配沙門島籍入其
家竄緝台州綜秀州綜溫州綰睦州續永州菱處州蓋均州并
官司十餘人皆降罷除名時論究之擢傑龍圖直學士知蘇州
張商英入相始辨前獄移鈇常州改授內殿崇班綜復朝奉郎

通判秀州遷倉部員外提點兩浙刑獄以龍圖直學士知越州
參譚稹軍宣撫燕山加右文殿修撰後金人破蔚州議稹措置
乖方坐落職會赦恩告老復龍圖直學士致仕卒 望之字表
民少孤喜同學志氣弘放爲文辯博長於議論以校書郎監杭
州茶庫母憂毀瘠過制服除值兄拱之知習江忤守蔡襄誣貶
爲訴於朝復官望之遂不仕覃恩還大理評事歐陽修韓絳吳
奎劉敞范鎮同薦其才擢建康軍節度判官知烏程俱辭不起
終光祿丞致仕卒平生嘗北遊齊趙南汎湖湘西至汧隴東極
吳會山水勝處無不涉歷有所警救性七篇專宗孟氏排荀楊
韓并李翱之說又非歐陽修論魏梁爲正統著明統三篇復訂
李觀所著論謂仁義智信與樂刑政皆出於禮著禮論一篇其
歌詩雜文又數百篇集爲三十卷人稱其議論有大過人者

晏殊字同叔撫州臨川人自幼以神童薦

前後高宗
徽宗弘道錄

帝嘉賞賜

同進士出身復試詩賦論益加稱善擢秘書正字改直史館所
與遊處多知名士陳彭年亟稱許之名試中書遷奉禮郎東封
遼光祿丞爲集賢校理外艱起復詔修實訓從祀太清官判太
常禮院內艱復求終制不許遷太常寺丞擢左正言昇王府記
室參軍歲中遷戶部員外郎天禧二年八月忽自中批除太子
舍人宰相不知所由次日進見上曰近聞館閣臣僚多事嬉遊
彌日繼夕惟殊杜門與兄弟讀書如此謹厚正可謂東宮官名
論對以臣非不樂宴遊直以貧無可爲之具上益嘉其誠實眷
注日深尋知制誥判集賢院久之爲翰林學士兼左庶子仁宗
卽位丁謂曹利用各欲獨覲奏事殊建言羣臣奏事太后垂簾
聽之皆毋得見其議始決遷右諫議大夫兼侍讀學士轉給事

中預修真宗實錄進禮部侍郎拜樞密副使疏論張耆不可任
樞密忤太后旨會幸玉清宮怒持笏者後至撞之折齒爲御史
劾罷知宣州改應天自五代以來學校久廢殊始爲興舉嚴條
約延師以教生徒江南人知學自殊始也召拜御史中丞資政
殿大學士兵部侍郎參知政事進左丞禮部尚書太后崩罷知
亳州徙陳州俄遷刑部尚書復兼中丞爲三司使陝西方用兵
請罷內臣監軍悉授諸將陣圖使得自應敵爲攻守計及募弓
箭手教之以備戰鬪又請出宮中長物助邊費悉罷他司領財
利者使還度支俱見施行康定初拜樞密使同中書門下平章
事婿富弼方任副樞堅辭不許慶曆二年改集賢殿學士同平
章事仍兼樞密甚見信遇平居好結賢士而小人權倖皆不便
有言被詔撰宸妃墓誌不言誕育聖躬其實方太后臨朝有所

不敢又輔臣例宜借官兵私治僦舍以爲擅役坐是左遷工部尚書知穎陳許三州時謂非辜稍復禮刑二部尚書祀明堂遷戶部尚書以觀文殿大學士知永興軍徙河南遷兵部尚書皇祐間有疾請歸訪醫疾平特留經筵詔五日一與起居儀從如宰相至和初寢劇乘輿將臨視馳奏請免二年正月丁亥薨帝臨奠以不及視爲恨罷朝贈司空兼侍中諡元獻篆其神道曰舊學之碑爲人性剛簡遇人必以誠奉養清儉雖處富貴如寒士然樽酒相對懽如也累典方州吏民畏其愀急其爲文章瞻麗應用不窮尤工詩閑雅有情思晚歲篤學不倦有文集二百四十卷及刪次梁陳以後名臣述作爲集選一百卷子知止朝請大夫

杜衍字世昌紹興山陰人度支員外遂良之子總髮苦志篤學

麟操擢第補揚州觀察推官歷著作佐郎知平遙縣通判晉州
知乾州以陳堯咨薦詔旌卓異特賜宴勞移權鳳翔二州民邀
境上俄除太常博士提點河東刑獄按行潞州屢折冤獄人有
誣告知石州王繼昇連蕃族謀變衍廉得其冤抵告者罪寧化
軍守將鞠人死罪不以實衍覆正之遷祠部員外郎徙京西路
移知揚州復辨疑獄法當賞改刑部章獻后察其治狀轉河東
運副陝西運使召爲三司戶部天章閣待制會河北乏軍資選
爲都轉運使遷工部郎中不增賦而用足還授樞密直學士求
外以右諫議大夫知天雄軍爲治謹密不以威刑督下吏民咸
仰其清整仁宗親政召爲御史中丞奏中書樞密古之三事太
臣坐而論道者今止隻日對前殿何以盡天下之事宜迭召見
賜坐便殿以極獻可替否其他不必親煩陛下又議常平法請

量州郡遠近。戶口衆寡。嚴賞罰。課官吏。出納無壅。增損有無。公
羅未充。則禁爭糴。以規利者。糴畢而儲之。復察其以供軍爲名。
而假借者。州郡闕母錢。願出官帑助之。皆見裨益。判吏部流內
銓。先因科格繁長。主判不能悉。吏多受賕。出縮爲奸。衍敕吏盡
函銓法閱視本末。悉自與奪。雖有賄莫能行。遂聲動京師。改知
審官院。其裁制如判銓。時遷工部侍郎。知永興軍。捕盜得民亡
婦并殺他婦屍二秦人。大驚徙并州。加龍圖閣學士。寶元二年。
轉刑部侍郎。復知永興。民方苦用兵。調發更緣爲奸。衍區處計。
畫量道里遠近。爲寬期。會使民次第輸納。比他州費省過半。召
還。權知開封。貨近歛跡。康定初。拜同知樞密院事。改副使。夏竦
議攻守宰相。欲用出師之策。衍謂僥倖成功。非萬全計。爭議久。
之求罷。手詔敦勉。徙河東。宣撫使尋轉吏部侍郎。拜樞密使。內。

降恩幸寢不行。積至十數封。紘帝前帝語諫官歐陽脩曰。外人徒知杜衍封還內降。不知凡有求於朕。以衍不可而止者更多。於所封還也。契丹與元昊戰。宣撫范仲淹請以兵從衍爭議。帝前謂二國交鬪。勢必不來。我兵不可妄出。仲淹嘗父事衍。至詆語甚切。未嘗恨之。帝問契丹將劉三殿歸款。朝議厚館以詰敵陰事。衍曰。中國主信義。若違誓納叛。不直在我。且彼堂堂近親。逋逃來歸。謀身若此。謀國可知。納之何益。不受還之。拜同平章事。集賢殿大學士兼樞密使。好薦引賢士。推獎後進。一時知名之士多出其門。沮止僥倖。小人多不悅。言者攻仲淹富弼。帝欲罷其政事。衍常左右之。御史并劾衍。弼蘇舜欽伎樂娛賓。及所知王益柔戲作傲歌。因以危衍。能爲尚書左丞。出知兗州。丁度草制言其朋比。然衍平日議論實無是情。以度嘗求大用爲孫

甫所奏甫使契丹度力求置對衍寢其事衍之故也慶曆七年
乞骸買昌朝因與不諧遂以太子少師致仕時議故相一上章
卽允且以孤階皆非故事皇祐元年加特進太子太保陪祀明
堂詔有司敦遣就道都亭設帳具几杖待之稱疾固辭加太子
太傅賜子同進士出身又進太子太師詔王洙存問封祁國公
爲人勤儉好學自少清羸若不勝衣年過四十鬚髮盡白立朝
峻節凜然不可屈性復清介不殖私產退寓南都第室卑陋纔
數十楹而已出入簡素烏帽綈袍晏如也或勸爲居士服辭曰
壯而叨榮老仍謝事尚可竊高士名耶居家見賓客必問時事
聞有善言若已出至其所不可則憂見于色或夜不寐如任其
責者善爲詩楷書行草皆有法嘉祐元年病遣使挾醫往視不
及二年二月壬戌薨年八十戒其子努力忠孝欽悉從儉小墳

庫冢遺疏不及私略曰無以久安而忽邊防無以既富而輕財用早建儲嗣以安人心贈大司馬兼侍中諡曰正獻

賈昌朝字子明真定獲鹿人從曾祖緯晉史館伯祖琰字季華父偉晉中書舍人給事中以蔭授官太宗尹京奏爲推官居幕府勤於所職風神峻整有吏卒卽位超拜左正議大夫樞密直學士三司副使卒兄弟五人皆相繼亡琰拊循孤幼聚族百口庭無間言昌朝天禧初真宗祈穀南郊獻頌名試賜同進士出身主首陵簿賜對便殿除國子監說書孫夷稱其講說有法若唐路隨韋處厚乃用經術擢潁川郡王府伴讀遷殿中丞歷知宜興明二縣吏老薦以自代召試中書上言禮母之諱不出宮闈今章獻服除猶諱其父名非所以尊宗廟也詔從之景祐中授崇政殿說書帝多所質問講說明白請記錄以進賜名邇

英延義記注加直集賢院舉易所言沔雷震君子以恐懼修省
今太平興國寺災旦夕大雷震電此殆天心示警可勿繕治以
示畏天愛人之意又西域僧獻佛骨銅像請悉加賜遣還帝行
其言天章閣初置侍講首以命之遷禮部郎中史館修撰時議
收劉平家賜石元孫死昌朝言漢族李陵有後悔先帝厚撫王
繼忠家終得其用咸得免擢知制誥權判流內銓請舉小縣
令不限以俸進龍圖閣直學士權知開封遷右諫議大夫權御
史中丞兼判國子監議者欲以金縢昭契丹使攻元昊昌朝言
設若有功則責報無窮矣力止之因上言方今國家削方鎮太
過用恩倖太驟如楊崇勳李昭亮望速遷士代之其有功宿將
無數更易刺史以上宜慎所授以待有功又上備邊六事馭將
帥復土兵訓營卒制遠人綏蕃部謹規候書奏多施行之復請

度經費能不懇詔與三司合議朝臣年七十有功狀可留者勿
拘耄不任事者令致仕歲所省幾百萬慶曆三年拜叅知政事
言用兵以來民力困敝請詔諸路轉運毋得承例折變科率須
科折者悉聽奏裁雖奉旨及三司文移於民不便者亦得上聞
五年命代杜衍以工部侍郎拜同中書門下平章事集賢殿大
學士兼樞密使居兩月進昭文館大學士監脩國史議升祔三
后章獻母儀天下章懿誕育聖躬宜如元德皇后故事升祔章
惠特慈保之恩依舊別享奉慈廟從之元昊款附罷兼樞密六
年日食帝諭輔臣願歸罪朕躬卿等宜究民疾苦思所以利安
之又曰人主懼天脩德猶人臣畏法而自新也皆頓首謝明年
春旱復引故事乞罷未許俄欲貸向綬獄與諫官吳育爭議不
決中丞高若訥因奏大臣喧訟不肅故雨不時若隨罷育除昌

朝武勝軍節度使檢校太傅判大名兼北京留守河北安撫使
賜銀飾肩輿尋以討貝賊功移山南東道先是契丹聚亡卒勇
悍者號投來南軍以戰夏人而邊法卒亡自歸者死昌朝特爲
變法寬之歸者稍衆因廉知契丹事邊人與契丹交質地致邊
界不靖爲立法以後主不時贖人得而贖之歲餘地悉復舊俄
坐三司使葉清臣移用河北庫錢格詔不與徙判鄭州過闕留
爲祥源觀使拜尚書右僕射觀文殿大學士判尚書都省班及
儀物視宰相歲中求外復除山南東道固辭僕射侍中改同平
章事母喪服除判許州召對遇英閣命講乾卦奏聖人外以剛
健決事內以謙恭應物不敢自矜爲天下首乃吉手詔優獎以
將相侍講天下盛事又言漢唐都雍置三輔內翼京師朝廷都
汴而近京諸郡皆屬他道不稱請析京東之曹州京西之陳許

滑鄭皆隸開封以四十二縣爲京畿從之將行命餞于資善堂
改判大名兼河北安撫時河決商胡請復故道不從語在河渠
志六塔功敗賓棣德博民多死掠之甚力內侍劉恢往視還言
河決趙征村與帝名嫌不祥時謂昌朝使之以攝當國者嘉祐
元年進封許國公兼侍中尋復樞密使三年彥博請罷臺諫陳
升之等恐其代之乃攻昌朝結宦官宮人創建大第矯制者輒
不問罷爲鎮安軍節度使兼景靈宮使復判許州又轉保平軍
陝州大都督府長史兼大名府安撫使英宗卽位徙鳳翔節度
使加左僕射進封魏國公治平元年以侍中守許州力辭弗許
明年以疾留京師卒年六十八諡文元御書墓碑曰大儒元老
之碑所著羣經音辨通紀時令奏議文集百二十二卷昌朝在
侍從得名譽及執政乃不爲正人所與數有攻其結宦官宮人

者子章館閣校勘蚤世清朝請大夫伯祖琰字季華晉中書舍人偉之子以蔭授臨淄縣丘主簿歷通判澧州太宗尹京奏以爲開封府推官加左贊善大夫及卽位超拜左正議大夫未幾擢三司副使風神峻整有吏幹佐太宗居幕府凡五年勤於所職昆弟五人琰最幼諸兄相繼死琰拊循孤幼聚族凡百口分給衣食庭無間言士大夫以此稱之太平興國二年卒子湜至軍器庫使交趾黎桓之篡朝命孫全興將兵往討湜掌軍事黎桓僞降全興信之遂北湜坐失律誅次汾至殿中丞湜子昌符賜同學究出身汾子昌齡第進士爲屯田員外郎昌朝弟昌衡字子平舉進士爲梓州路轉運判官賈人請富順井鹽吏視貽多寡爲先後昌衡一隨月食給之瀘州邊彝魯故時守以武吏昌衡請由東銓調選徙提點淮南刑獄廣東轉運使徙兩

浙路熙寧更法昌衡數言利害神宗獎其論奏忠益召爲戶部副使提舉市易司課羨增秩右諫議大夫加集賢殿脩撰知河南府歷陳鄆應天府鄧州以正議大夫致仕卒從子炎字長卿以昌朝蔭更歷倉庫積進至工部侍郎政和中以顯謨閣待制知應天府徙鄆州永興初陝西行鐵錢久幣益輕蔡京設法盡歛之更鑄夾錫錢幣稍重京去相鐵錢復行童貫又令盡廢夾錫民益以爲苦炎徙知延安因表言錢法屢變人心愈惑今人以爲利者臣見其害以爲是者臣見其非中產之家不過畜夾錫錢一二萬既棄不用則惟有守錢而死耳邊吐生理蕭條官又一再變法郡延去敵迫近民殊不安民不安則邊不可守願得內郡以養母乃命爲潁州未行復留與貫制驛事不合貫沮之改河陽又改鄧州加直學士知永興入對留爲工部侍郎

弘簡錄
貫簽書樞密院災。獨不往賀。會以疾卒。年五十八。贈銀青光祿大夫。

弘簡錄卷一百之二

終

弘簡錄卷一百之三

明刑部員外郎仁和弘齋邵經邦學

皇清翰林院侍講學士四世孫遠平校閱

宰輔 宋二之五

文彥博

宋庠

子均國充國孫喬年曾孫昇

龐籍

孫恭孫

梁適

父顯兄固孫子美

陳執中

劉沆

子瑾

曾公亮

子孝寬孝廣孝蘊從子孝序

文彥博字寬夫汾州介休人其先本敬氏以避諱改少從穎昌史照學照母異之曰貴人也待之甚厚及進士第知翼城縣通判絳州爲監察御史轉殿中侍御史西方用兵彥博言偏校有臨陳不用命者大將請得以軍法從事不待中覆仁宗是之黃德和誣劉平降敵以金帶賂平奴使證其說平家二百口皆械繫詔彥博置獄河中鞠治得實德和謀翻獄遣他御史來彥博

拒不納曰。朝廷慮獄不就。故遣君。今案具矣。宜亟還。德和并奴卒就誅。以直史館爲河東轉運副使。鄆州餉道回遠。銀城河外。有唐時故道。廢弗治。彥博父洎常爲轉運使。謀復之。未及而卒。彥博成父志。盡復故道。益儲粟。元昊來寇。圍城十日。知有備。解去。遷天章閣待制。都轉運使。進樞密直學士。知泰州。改益州。拜樞密副使。參知政事。貝州王則反。明鎬討之不克。命彥博爲宣撫使。旬日賊潰。樞則送京師。拜同中書門下平章事。薦張瓌。韓維。王安石等。恬退守道。乞褒勸。以厲風俗。與樞密使龐籍議省兵。凡汰爲民及給半廩者合八萬。論者紛然。訖不爲。阻御史唐介劾彥博在蜀。日以奇錦結宮掖。因之登用。介旣貶。彥博亦罷。爲觀文殿大學士。知許州。改忠武軍節度使。知永興軍。至和二年。召復相位。與富弼同拜。因言頃者唐介言事多中。臣病其間。

雖有風聞之誤。治之太深。時人莫不稱其厚德。明年帝正旦。受
朝疾暴作。扶入禁中。呼內侍史志聰問狀。志聰不言。彥博叱曰。
爾曹不令宰相知。天子起居欲何爲耶。自今疾勢增損。必以告
不爾當行軍法。又與同列謀啓醮大慶殿。因留宿殿廡。志聰辭
以無故事。答曰。此豈論故事耶。有禁卒誣告都虞候爲亂。知開
封王素夜叩宮門不使入。明旦言狀。劉沆欲捕治彥博。召都指
揮許懷德問都虞候何如。人懷德言其謹愿。可保。彥博曰。是卒
有怨誣之耳。當亟誅以靖衆。乃請沆判狀尾。遂斬卒。內侍武繼
隆陰受留守賈昌朝約。令司天二人抗言富弼不當用。李仲昌
策穿六潔渠以致上體不安。彥博知其意。漫曰。彼本不敢妄言。
有教之者耳。後數日。繼隆又教二人請皇后同聽政。志聰白其
狀。彥博密懷之。徐召二人詰曰。天變職所當言。何得輒預國家

大事。汝罪當族。二人懼謝。彥博曰。觀汝真狂愚耳。未忍治汝罪。後勿復然。已乃出狀示同列。皆憤怒曰。何不斬之。答曰。斬之則事彰灼於中宮。不安。皆曰善。既而遣定六潔方位。復使二人往。二人恐治前罪。更言六潔在東北。非正北也。帝疾愈。始歸第。沆審白彥博擅斬告反者。彥博以沆判呈帝。意方解。嘉祐三年罷政。以河陽三城節度使同平章事判河南封潞國公。改鎮保平。判大名。又鎮成德。遷尚書左僕射。判太原內艱去位。初帝疾時。彥博等疏請建儲。帝許之。既而後宮將有就館者。故其事緩。英宗卽位。詔起復。不就。服闋入覲。論曰。朕之立。皆卿功也。彥博悚然謝曰。陛下入繼大統。乃先帝聖意。皇太后協贊。臣何功之有。況陛下登儲纂極。臣方在外。何與焉。帝曰。備開始議卿於朕。有恩。尋除侍中。徙鎮淮南。判永興軍。治平二年入爲樞密使。領

節劔南西川神宗卽位詔以朝廷宗臣令班陳升之上以稱遇
賢之意固辭曰國朝樞密無班宰相上者臣忝知禮義敢效曹
利用以素朝著乃止俄授檢校司徒兼中書令上嘗謂富令理
財最爲急務養兵備邊府庫不可不豐大臣宜共留意時安石
希旨用事夏人犯大順慶帥李復圭命鈐轄李信等出戰而敗
獨奏信罪曲誅之秦人以爲冤慶兵遂亂彥博上言朝廷行事
務合人心宜兼采衆論以靜重爲先陛下屬精求治而人心未
安蓋更張之過也祖宗法未必皆不可行但有偏而不舉之弊
耳安石知爲已發奮然挑之曰求去民害何爲不可若萬事靡
靡乃西晉之風何益於治御史張商英附安石撫樞密他事以
搖彥博坐不實貶在樞府九年常極論市易司監賣果核與下
民爭利損國斂怨致華嶽山崩安石詆之遂力引去拜司空河

東節度使判河陽徙大名身雖在外而眷注有加判官汪輔之
新進奏其不事事帝抵其奏曰本以侍中舊德故煩臥護北門
細務不必勞心遂罷輔之初選人李公義請以鐵龍爪治河宦
者黃懷信沿其制爲濬川杷天下指以爲笑安石獨信之都水
丞范子淵奏用杷之功未歸故道退出民田數萬頃詔下核實
彥博言河非杷可濬臣不敢雷同罔上帝不悅尋加司徒元豐
三年拜太尉復判河南七年二月甲戌入朝賜宴垂拱殿王同
老復言至和中議儲嗣事神宗又問彥博如前對帝曰雖云天
命亦繫人謀卿深厚不伐陰德如丙吉真社稷臣也三月辛丑
將行賜宴瓊林苑遣中謁者遺詩祖道當世榮之王中正經制
邊事所過稱密旨募禁兵彥博獨以無詔拒之遂去久之請老
以太師致仕居洛陽元祐初宣仁臨朝恩禮尤渥將用爲三省

長官言其太重乃以平章軍國重事凡居五年復致仕紹聖初
降太子少保薨年九十二後預黨籍政和五年追論定策功特
命出之追復太師諡忠烈爲人凝簡莊重顧盼有威逮事四朝
薦更二府偏歷公孤七換節鉞五十餘年雖窮貴極富而平居
接物謙下尊德樂善如恐不及邵雍二程皆以道自重賁接之
如布衣交建洛陽耆英會與富弼司馬光以下十三人置酒賦
詩相樂序齒不序官熙寧中妖尼惠普就逮公卿多與簡牘彥
博獨無帝問之答曰臣但不知如知之亦不免人皆服其能分
謗神宗導洛通汴而主者過絕洛水不使入城洛人患之因中
使劉惟簡以聞詔令通行如初遂爲無窮之利八子恭祖貽慶
齊賢保雍居中及甫維申宗道皆歷要官惟及甫最顯以典同
文館獄誣證元祐大臣士論少之

冊曰碩德耆英不念舊惡仰壽而康五福綿絡如斯人者
吾所願學

宋庠字公序開封雍丘人高祖紳唐御史中丞曾祖駢漢乾封
令祖耀周霍丘令父杞端拱二年明經及第治獄有陰德終荆
南節度推官母鍾氏憐于虛阜夢道士授以書曰以遺爾子視
之小戴禮也已而生庠少篤學遭父喪寓家安州夏竦見而器
之天聖初第進士除大理評事同判襄州召試遷太子中允直
史館歷三司戶部判官同修起居注再遷左正言坐伏閣爭郭
后事罰金久之知制誥上言今策賢良茂才等科乃與武舉人
雜試非所以待天下士宜如故事命有司設幕次具飲膳令武
舉人就別試詔從之兼史館修撰知審刑院密州豪王濟犯私
釀鄰人往捕濟給奴曰盜也使盡殺之州論奴以法濟獨不坐

庠力爭之抵牾死會災異言上天示警所以戒政事今惟開寺觀爲民祈福恐非所以致嘉應也改禮吏部流內銓尋陞員外郎上起之厚拜翰林學士庠初名郊李淑恐其先用以奇中之曰宋受命之號郊交也合姓名言之爲不祥上乃令開今名實元二年加右諫議大夫參知政事嘗論唐入閤儀奏云唐有大內大明宮在其東北謂之東內高宗以後天子多居大明宮其正南門曰丹墀第一殿曰含元大朝會則御之第二殿曰宣政謂之正衙朔望大冊拜則御之第三殿曰紫宸謂之上閤亦曰內衙隻日常朝則御之天子坐朝須立仗於正衙或止御紫宸卽喚仗自宣政殿兩門入是謂東西上閤門也以本朝宮殿視之宣德門唐升鳳門也大慶殿唐含元殿也文德殿唐宣政殿也惟紫宸殿同但其制度南北不相對稱今欲求入閤本意施

於儀典。須先立仗。文德殿庭如唐制。奠仗自東西閤門入。如此則差與舊儀合。又按唐自中葉以還。雙日及非時大臣奏事。別開延英殿。若今假日御崇政延和是也。乃知唐制每遇坐朝日。卽爲入閤。其後正衙立仗。因而遂廢。甚非禮也。庠旣自以材術受知。進用天下事有未便者。數論上前。因爲夷簡所忌。指爲朋黨。出知揚州。未幾以資政殿學士徙鄆州。進給事中。慶曆五年。復召爲樞密副使。七年春旱。例免爲右諫議大夫。夏竦因陳執中爲相不學少文。勸上召二府對資政殿。手詔策以時事。欲困之。庠言兩漢對策。本延農穴草萊之士。今令政府大臣效之。非所以尊朝廷。請至中書合議。條奏時以爲知體。明年除工部侍郎。充樞密使。皇祐元年。拜兵部尚書。同中書門下平章事。集賢殿大學士。上欲用張堯佐爲使相。庠執不可。會張彥方僞官。

事露庠子與之遊包拯奏其輔政無所建明且不敢子弟罷爲
刑部尚書觀文殿大學士知河南徙許州河陽再遷兵部尚書
朝京師時上疾少間臣下希聞德音及覲特賜坐勞問嘉祐三
年復拜檢校太尉同平章事充樞密使封荅國公數言國家慎
固根本畿輔宿兵常盈四十萬羨則出補更戍祖宗初謀不可
輕改既又與樞副程戡不協五年以河陽三城節度同平章事
判鄭州徙相州上章請老英宗卽位移鎮武軍改封鄴國公諭
以初臨天下未忍遽從命判亳州前後所歷以慎靜爲治及晚
頗浮沈自安人多言其昏惰尤愛信幼子與匪人遊呂晦請赦
絕其子從宦帝憐其老不許累階開府儀同三司勳上柱國以
司空致仕薨年七十一贈太尉兼侍中諡元獻帝爲篆神道碑
曰忠規德範爲人端直清畏性復儉約不好聲色進止皆有法

度卽上有所問必據經以對退未嘗與人言或薦引人材惟恐其間接賓客齷齪論文不少休早以名擅天下至老猶不輟有文集四十卷又校定國語補音三卷輯紀年通譜區別正閏爲十二卷及披垣叢志尊號錄子均國國子博士充國刻意問學以寄理罷舉仁宗召試學士院賜進士出身簽書河南判官判登聞鼓院知太常禮院英宗祔廟議者欲祧倍祖藏夾室充國請配感生帝爲宋始祖從之東西府建上二箴以戒大臣不憚會廟饗宿齋其妻趙兩妾至自劾以大中大夫致仕卒爲人性剛介孝於奉親平居得微物必先薦家廟乃敢嘗孫喬年字仙民以蔭監市易坐女謁失官落拓二十年女嫁蔡攸京當國復起用崇寧中提舉開封縣鎮府界常平改提點京西北路刑獄賜進士出身加集賢殿修撰京畿運副進顯謨閣待制爲

轉運使至開封尹復以龍圖閣學士知河南京罷貶保靜軍節
副斬州安置京復相還舊官爲戶部郎中知陳州卒年六十七
曾孫昇字景裕崇寧初由譙縣尉爲勅令剛定官數年至殿
中少監父子依憑蔡氏陵棟士夫陰交諫官蔡居厚爲鷹犬以
微猷閑待制知陳州未幾知應天爲京西都運蒞葺西宮及修
三山新河摧顯謨閣學士徽宗議謁諸陵有司預爲西幸之備
昇治宮城廣袤十六里創廊屋四百四十間費不可勝至灰人
骨爲髹漆胎盡發洛城外古墓與衣冠壘兆遷正議大夫殿中
監又命補泊三陵泄水坑澗計役四百九十萬工卒贈金紫光
祿大夫廷康殿學士

龐籍字醇之單州武城人曾祖武祖文進父格皆贈官籍登祥
符進士爲黃州司理參軍知州夏竦器其材調開封兵曹知府

薛奎薦爲法曹遷大理丞知襄邑預修天聖編敕歷刑部詳覆
官羣牧判官轉對言四事一內侍楊懷敏不當借帶甲馬雖羣
牧覆奏仍復借之二百官奏事止送中書密院近歲璽書內降
寔多無以防杜倖門三作坊料物庫主吏盜官物逃避以官掖
親遽罷追究四祥符令凡檢下嚴胥吏相率去坐免若是則清
蠹者沮矣久之出知秀州召爲殿中侍御史章獻太后崩遣詔
楊太妃議軍國事籍請下閣門取垂簾餽燔之仁宗親政奏用
人宜辨邪正防朋黨採公論毋令出於執政孔道輔以其言事
不觀望宰相意稱爲天子御史擢開封判官論尚美人遣內侍
稱教旨免官人市租自祖宗來未有此制帝聞之詔杖內侍自
今宮中傳命毋得輒受遷祠部員外郎殿中侍御史劾范諷罪
坐貶籍亦降太常博士知臨江軍尋徙福建轉運景祐三年復

侍御史改知雜事判大理寺進天章閣待制元昊反爲陝西體
量安撫使坐令府吏馮士元市女口降知汝州徙同州就除陝
西都轉運使建言頻歲災異天久不雨宮中費用奢靡出納不
嚴須索煩多有司無從鈎校矧今宿兵西鄙將士力戰弗獲功
賞而內侍醫與樂官無功享賜願通加裁損體先帝修德弭災
之意賊寇不足平也進龍圖閣直學士知延州俄兼鄜延都總
管經略安撫緣邊招討等使明年換左諫議大夫自元昊陷金
明承平塞門安遠栲栳諸砦又破五龍川邊民焚掠殆盡籍至
稍葺治之戍兵十萬無壁壘皆散處城中畏籍莫敢犯法金明
西北有渾州川土沃衍川尾曰橋子谷寇出入之隘籍使部將
狄青將萬餘人築招安砦于谷旁募民耕種膽軍又使周美襲
承平砦王信築龍安砦悉復所亡地築十一城及開平戎道通

永和烏仁關更東西陣法爲方陣損益兵械元昊遣李文貴齎書送款籍疑爲詐益屯兵青澗城後數月果寇定川召文貴開諭遣去旣而旺榮又以書來會帝厭兵欲招懷之遣籍報書呼旺榮爲太尉籍奏陪臣當此又可臣其主哉仍因彼官名稱爲謨寧令從之會又改名曩霄遣賀從場來稱男不稱臣籍不敢聞送詣闕下因奏羌久不通和市國人愁怨今辭理寢順必有改事中國之心請遣使者申諭朝廷採用其策卒臣元昊召爲樞密副使時公私困於用兵籍請併省官屬退近塞之兵就食內地頗省邊費慶曆八年拜參知政事皇祐初轉工部侍郎爲樞密使三年以戶部侍郎同中書門下平章事昭文館大學士監修國史皆近時入相未有乃殊恩也狄青討儂智高韓絳謂武人不宜獨任宣撫帝以問籍言若副以文臣則號令不專不

如不遣益詔嶺南諸軍受青節度。旣而捷書至帝歸功於籍。又欲以青爲樞密使同平章事。力爭不聽。嶺南平推恩六百九十人。時以爲過。有齊州學究皇甫淵捕賊有功。當賞。因賂遺道士趙清。祝與堂吏復爲絳論劾。罷知鄆州數月。加觀文殿大學士。昭德軍節度使知永興軍。改并州。密疏擇宗室之賢者爲皇子。其言甚切。坐擅聽麟州築堡。白草平州將武戡等爲夏人所掩。罷節度。以戶部侍郎徙知青。與定州告老加太子太保致仕。封潁國公。嘉祐八年三月戊申薨。年七十六。仁宗不豫。不果臨遣使弔。贈英宗贈司空加侍中諡莊敏。爲人曉律令。長於吏事。持法深峭。軍中有犯斷斬剝膚累笞至死。以故士卒畏服。治民頗有惠愛。及爲相。聲望減于治郡時。五子元魯登第爲大理丞。早卒。元英朝散大夫太常博士元中右贊善大夫元常元直皆

大理丞 孫恭孫字德孺蔭補施州通判素貪縱在西南二十
年崇寧中開邊城所得州縣實不毛地多張虛名褒遷徽猷閣
待制至直學士蜀人病之

梁適字仲賢東平人高祖涓武城主簿曾祖惟忠以明經至天
平軍節度判官祖文度早世父頤依王禹偁學大加器賞屢試
不第獻疏略曰當今所取不出於詩賦小技喜棄隨人寧無濫
陟枉黜之患以今丘園之下宏才茂德之士誠能擢以異等俾
陳古今治亂君臣得失生民利害賢愚用舍庶幾有益于治雍
熙二年始狀元及第解褐大名推官召爲右拾遺直史館判登
聞院坐翟馬周事貶虢州司戶叅軍起爲大理評事知魚臺縣
遷殿中丞歷開封推官三司關西道判官轉太常博士內艱起
復改右司諫真宗初使陝西作聽政箴以獻還爲度支判官咸

平元年同知貢舉錢若水表同修太祖實錄并起居注扈蹕大名陳言邊務兵法曰罰之不行譬如驕子之不可用非者傳濟奉明詔握重兵逗撓無謀守陴玩寇願加明罰仍于邊將中擇其武勇謀略者十人。人付騎士五千。輕齎糧糗。遇有寇兵。隨時掩捕。緣邊州郡烽燧相望。遇游騎掩殺。隨即救援。如此則乘城者不堅。閉壘門坐觀勝負。捍邊者不苟依郡郭。往復有期。時論稱之。三年擢知制誥。賜金紫。王均平爲峽路安撫使。歸掌三班院。代韓國華判大理。四年副張齊賢使關右。有吏才。每進對詞。辯明敏真。宗嘉之。凡羣臣上封者。付穎伯薛暎詳閱。可否又與暎分爲河北東西路巡檢使。察民饑盜。還拜右諫議大夫。翰林學士。同知審官院。景德元年權知開封。卒年九十二。生平美風姿。彊力少疾。閨門雍睦。與人交久而無改。士大夫多之。適少

孤嘗輯父遺文及所自著以進眞宗覽之曰願不孤矣授秘書
正字知崑山徙梧州更舉進士知淮陽軍奏減京東預買紬百
三十萬論景祐赦書不當錄朱梁後仁宗記其名召爲審刑院
詳議官駁梓州人白彥歡依鬼神詛說殺人甚于金刃止野烏
集端門此非國瑞與同院燕肅奏何次公案帝問漢時亦有字
次公者肅不能對適舉蓋寬饒黃霸二人字帝嘉其博覽因詢
家世益器之拜右正言疏林瑀不當山中旨除天章閣侍講夏
守贊爲將無功不宜復興舊密值婦黨任中師執政以親嫌改
直史館修起居注使陝西條邊機十餘事進知制誥權發遣開
封府歲餘出知兗州募人治萊蕪鐵冶民得不病頻歲課溢遷
樞密直學士知延州告歸治葬過京師得入見自言前被朋黨
擠逐留爲翰林學士御史劾之以侍讀學士出知涇與秦州復

知審刑院皇祐初擢樞密副使因帝怒臺諫論張堯佐奏以論
事乃職所當然堯佐恩遇實過恐非所以全之遂奪二使又因
懷智高嫚書求邕桂節度帝將許之適奏言若爾則嶺表之外
非復朝廷有矣議遣狄青致討及平帝語適曰向非卿言南方
安危未可知遷叅知政事契丹欲易國書稱南北朝適奏宋號
乃受之于天何可改易契丹本其國名無名何以立國五年進
同中書門下平章事集賢殿大學士大瑤王守忠求爲節度適
持不可張貴妃治喪皇儀將以爲園陵使適又言國朝以來無
此制與陳執中不合御史馬遵吳中復論茶商納交子弟出判
官李虞卿罷知鄭州加觀文殿大學士知泰州初建古渭砦間
爲屬羌所鈔益兵拒守復以驚疑罷之具牛酒諭勞其人後不
爲患徙永興軍夏人盜耕屈野河西田累年朝廷欲正封除爲

定國軍節度使知并州至則悉復侵地六百里遷知河陽領忠
武昭德二鎮檢校太師以太子太保致仕熙寧三年進太傅卒
年七十贈司空兼侍中諡莊肅適晚暢軍法臨事有膽力而多
挾智數不爲清議所許兄固字仲堅幼有志節嘗著漢春秋
父器賞之舉服勤詞學科擢甲第解褐將作監丞同判密州除
著作郎直史館賜緋屋戶部勾院判官卒年三十三爲人氣調
俊爽善與人交疎財慷慨尚氣義明於吏道三司馬元方臨事
嚴率據其曠闕之狀屢請條對奉詔鞫獄時稱平審天禧大禮
成奏頌甚工孫子美紹聖中提舉湖南常平希時旨復役法
獨先諸路累遷直龍圖閣河北都轉運使有幹才所至辦治然
縱侈殘虐傾漕計奉上捐緡錢三百萬令契丹市北珠以進擢
爲戶部侍郎北珠出女真契丹嗜利虐使捕海東青以求珠兩

國之禍蓋始於此蔡京怒尚書會孝廣擢以代之大觀初拜中書侍郎踰年罷宣和二年爲開府儀同三司復領戶部卒贈少保

陳執中字昭譽恕子任秘書正字累遷衛尉丞知梧州上復古要道三篇其宗異而名之時上春秋高莫敢言建儲者復進演要三篇以蚤定天下根本爲說翌日以示輔臣稱善久之擢右正言逾月立皇太子遂寢寢向用俄坐御試進士卷差謬貶監岳州酒務無何轉殿中丞通判撫州復右正言曹利用壻盧士倫除福建運使憚遠不行改京東執中劾奏之利川挾私忿出知漢陽軍及利用得罪召爲羣牧判官權三司鹽鐵知諫院提舉諸司庫務以工部員外郎兼御史知雜同判流內銓遷三司戶部副使明道中安撫京東進天章閣待制還知應天徙江寧

揚州再遷工部郎中改龍圖閣直學士知永興軍寶元初拜右
諫議大夫同知樞密院事元昊寇延州咨訪方略奏言今賊勢
方張宜靜守以驕其志畜銳以挫其鋒增土兵以備守禦省騎
卒以減轉餽然後徐議邊平改張節度更須主張將臣橫議不
入則忠臣盡節矣康定初議刺土兵久不決罷爲資政殿學士
知河南慶曆元年轉知永興軍爲陝西馬步軍都總管加工部
侍郎與夏竦議邊事多異同詔令互出巡邊屯於涇州令諸部
焚除水草寇來無所藉復表言兵尚神密千里稟命非所以制
勝宜密屬四路以權各保疆圉朝議善之求解兵柄就知陝州
徙青州沂卒王倫叛趨淮南執中遣巡檢傅永吉追殺之采石
磯四年召拜參知政事諫官孫甫蔡襄等爭言其剛愎不學若
任以事天下不幸帝不聽遣使馳賜敕告五年擢同中書門下

平章事集賢殿大學士兼樞密使西夏納款請解樞密以春旱罷政降給事中踰月加昭文館大學士監修國史皇祐初以疾請外拜兵部尚書觀文殿大學士知陳州久之轉集慶軍節度使同平章事判大名河決商胡乘年豐調丁夫增築二百里以障橫潰名爲吏部尚書復相位每朝退卧中書東便門以防漏泄奏罷權勢所引三司勾當公事及監場務官內外肅然會張貴妃喪從王洙石全彬徇用非禮追問爲后治喪皇儀殿又執中有嬖妾笞小婢出外舍死于是御史趙抃執政歐陽修諫官范鎮中丞孫抃與其屬郭申錫等合班論奏罷爲鎮海軍節度使判亳州踰年辭節復拜尚書左僕射封英國公以疾就第加司徒進岐國公致仕卒贈太師兼侍中在中書八年人莫敢干以私四方問遺不及門惟殿前都指揮郭承祐數至其家及議

謚禮官韓維言其以公卿子。遭世承平。因緣一言。遂至貴顯。既秉大政。不能秉道奉禮。正身齊家。追冊張貴妃位號。於宮闈有嫌。建廟用樂。踰祖宗舊制。此不忠之大者。閨門之內。禮分不明。正室疎薄。庶妾悍逸。已獨杜門深居。謝絕賓客。曰我無私黨。豈不陋哉。請謚榮靈。後改恭襄。詔謚曰恭帝。篆神道碑曰褒忠之碑。子世儒官國子博士。坐妻與羣婢謀殺所生母。棄市。

劉沆字冲之。吉州永新人。祖景洪。事楊行密爲江西衙將。有彭玕者。據州自稱太守。以兵脅景洪。欲附湖南。景洪僞許之。得全一州。以歸行密。遂隱居不仕。嘗自稱不從玕。叛活幾萬人。後世當有興者。因名所居山曰後隆山。山有故相牛僧孺讀書堂。卽舊趾。榮臺曰聰明臺。父素亦不仕。以財雄里中。母夢牛相公來已而生沆。及長。個儻有氣槩。天聖八年登第。爲大理評事。通判

舒州章獻太后建資聖浮圖內侍張懷信督役嚴峻沆奏罷之
遷太常丞直集賢院出知衡州有尹姓大戶爲僞券以欺孤幼
訟久不直沆詢其父死已久鄰證安得皆在遂詞伏遷太常博
士歷三司度支戶部判官同修起居注擢右正言知制誥判吏
部流內銓使契丹坐酒間罵胥降知和州改江州值蠻寇鄧和
尚誘溪洞諸蠻以擾湖湘陞爲右諫議大夫龍圖閣直學士知
潭州兼安撫使許便宜從事至卽募土兵使保地分分遣提點
楊旼等八路入討斬獲并招降者萬餘賊平召還已而餘黨復
叛殺裨將胡元降知鄂州遷給事中還知審刑院有張彥方者
受富民金爲僞誥敕事敗論死彥方客張貴妃母越國夫人錢
氏家時妃有寵沆受辭不及越國妃德之皇祐三年遷工部侍
郎參知政事包拯論劾不聽妃薨追冊溫成皇后沆爲監護改

固陵使拜同中書門下平章事集賢殿大學士臺諫孫抃范師道母澁交論不報時二府任官多用例沆陳三弊其一近臣保薦皆浮薄不堪權豪之流相交汲引有司因以貿易遂使省府要職臺閣華資路分監司邊防寄任授非公選多出私門冗職掌吏人遞補無常或減選出官超資換職堂除便家先次差遣之類紛紛不一其弊難勝其二審官三班院當入川廣乃求近地當入近地又求在京及堂除升陟省府館職檢討之類近臣親屬悉多陳句其三敘錢穀管庫之勞捕盜昭雪之賞常格雖存僥倖尤甚往往干進於法雖輕于例則厚執政者不能持法多以例敘進之願詔中書樞密凡三事毋用例事雖施行衆頗不悅尋如舊文彥博富弼復相遷沆兵部侍郎位在弼下以非故事改監修國史沆既深疾言官因言自慶曆後臺諫強橫朝

廷命令事無當否悉論之必勝而後已專務扶人陰私莫辨之事以中傷士大夫執政畏其言進擢尤速請舉行御史遷次之格滿二歲者與知州遂出范師道趙抃等中丞張昇等言沆挾私適狄青亦因御史言罷知陳州沆言御史謀去將相創陛下爪牙至欲如何昇等論辨不已罷沆爲觀文殿大學士工部尚書知應天府徙陳州卒年六十六贈左僕射兼侍中仁宗賜以挽詩爲篆神道曰思賢之碑平生長于吏事性豪率少儀矩多任智數善刺探權近過失陰持之以軒輊取事論者以此少之子三瑾琢琯 璵字元忠初因辭賜溫成閣中金器請瑾試學士院遂帖職復登進士爲館閣校勘知制誥張環草沆詞語涉譏貶瑾泣涕不食詣宰相訴書命雖改坐衰服入公門罷職喪除不就官丐守墳墓王素爲請詔復職遷集賢校理通判睦州

爲淮南運副召修起居注加史館修撰河北運使拜天章閣待
制知瀛州徙廣州與密院論戍兵不合改處州都監楊從先拍
遣其子懋糾諸縣巡檢兵瑾怒責之爲懋所訴遂罷踰年復待
制知江州歷福興秦州成德軍卒瑾有操尚所泄以能稱然御
下苛嚴少縱舍好面折人短以故多致訾怨

曾公亮字明仲泉州晉江人登進士知會稽縣鏡湖旁民田患
溢爲立斗門泄水入曹娥江民受其利後坐買田境中謫監湖
州酒尋遷國子直講改諸王府侍講歲滿獻所爲文授集賢校
理天章閣待制修起居注故事不改服仁宗面賜金紫以寵儒
臣進知制誥兼史館修撰爲翰林學士判三班院院吏叢猥非
賕不行兼貴游子弟倚勢請謁公亮擬前後章程視以從事吏
不能欺俄除端明殿學士知鄭州爲政有聲盜悉竄他境道不

拾遺復召爲學士知開封府未幾擢給事中參知政事嘉祐五年改禮部侍郎除樞密使六年轉吏部侍郎同中書門下平章事集賢殿大學士性既明練久歷國家故事習知臺閣典憲首相韓琦每咨訪焉遂共定建儲大議密州民強盜積銀多抵死毀以銀乃禁物取之雖鹽與盜民家物異遂議比劫禁物法自是無死者契丹縱漁界河數通鹽舟吏恐較之生事不敢禁奏言萌芽不禁後將奈何屬雄州趙滋勇而有謀使諭以旨意邊害訖息英宗立爲中書侍郎兼禮部尚書值上不豫遣使至不能見命侍宴于館使者不肯赴責以錫宴不赴是不虔君命乃就席神宗立轉門下侍郎兼吏部尚書封英國公熙寧二年進昭文館大學士封魯國公以老遜位三年九月拜司空兼侍中河陽三城節度罷爲集禧觀使明年起判永興軍務以鎮靜裁

抑冗費先是有叛卒餘黨越陝以西州縣皆警備閱義勇益邊
兵人情騷然公亮次第奏罷之營卒揚言怨減削謀以上元喪
結外兵爲亂亦不爲動歲餘還京以太保致仕元豐元年薨年
八十帝臨哭輟朝贈太師中書令諡宣靖配享英宗廟庭神宗
策神道曰兩朝顧命定策亞勳之碑公亮方厚莊重深沉周密
平居謹繩墨蹈規矩然性吝嗇殖貨至鉅萬帝嘗以方張安世
初薦王安石及同輔政知上方向之陰爲子孫計凡更張庶事
一切聽順而外若不與之者安石德其助已故引擢其子孝寬
至政地以報之悲軼費以不能救正答云上與介甫如一人此
乃天也人以是譏其持祿保寵變法之禍不能辭其責云孝
寬字令韓初蔭知桐城縣除秘閣修撰提點開封府界鎮縣保
甲法行民驚恐籍爲兵知府韓維乞候農隙行之孝寬乃榜屬

縣捕告者民不敢訴維之言遂不行入知審官東院遷樞密都

承旨直學士簽書樞密院事連徙鎮卒年六十六 孝廣字仲

錫元豐末爲北外都水丞大臣議復河道名問言不可出判保

州除京西運判入爲水部員外河決內黃詔行視遂疏蘇村鑿

鉅野導河北流紓澶滑深瀛之害洛水復溢侵齧北岸孝廣按

河隄得廢渡口遺迹昔人所以殺水勢者卽日濬決之累石爲

防自是無水患御史論與胡安國鄒浩善奪職知饒州歷成德

軍知太原入爲戶部尚書坐缺錢帛出知杭州卒年六十贈正

議大夫 孝蘊字處善紹聖中管幹發運司建言楊之瓜洲潤

之京口常之犇牛易堰爲廊以便漕運公私便之提舉兩浙常

平改運判知臨江軍名爲左司員外郎遷起居舍人以顯謨閣

待制知歙州方臘起分兵守扼塞數郡內無得奔擾稍恃以安

改杭州值城已破單車至城下俄克復論功進顯謨閣直學士
加龍圖閣學士卒年六十五贈通議大夫從子孝序字達原
陰補將作監簿監海安鹽倉累官環慶經略安撫使與蔡京議
事不合又疏言方今結糴俵糴之法盡括民財充數京益怒嫉
御史宋聖寵劾其私事追逮削籍竄嶺表京罷授顯謨閣待制
知潭州復論從事與吳居厚不合落職知袁州尋復職再知潭
州改道州從人叛乘高恃險機毒矢下官軍不得前乃於兩山間
作巨木橫累以守夜遣驍銳攀援而上大兵繼進破之賊平歷
顯謨龍圖閣直學士知青州繕修城池訓練士卒儲峙金穀有
數年之備金人不取犯南渡歷除徽猷閣延康殿二學士召赴
行在許青民借留會臨朐土兵趙晟聚衆爲亂將官王定捕討
失利懼罪反以言撼敗卒斬關入城孝序據廳事曉諭之遂

與其子宜教郎訐皆遇害年七十九贈五官爲光祿大夫諡賊
愍訐承議郎城無主遂陷知臨湘陸有常率民兵拒守死于陣
贈朝散郎知益都張侃于乘縣丞于興宗亦死之贈二官各官
其家并子

間曰仁宗末年內寵外寇旋得互失尚不改舊厭勢漸移
寵利斯賸

弘簡錄卷一百之三

終